

I. DISPOSICIÓN XERAIS

MINISTERIO PARA A TRANSICIÓN ECOLÓXICA

13187 *Real decreto 1209/2018, do 28 de setembro, polo que se prorroga a situación de seca declarada para o ámbito da Confederación Hidrográfica do Xúcar polo Real decreto 355/2015, do 8 de maio, polo que se declara a situación de seca no ámbito territorial da Confederación Hidrográfica do Xúcar e se adoptan medidas excepcionais para a xestión dos recursos hídricos.*

O ano hidrolóxico 2013/14 foi extremadamente seco desde o punto de vista da meteoroloxía e a precipitación acumulada no ámbito territorial da Confederación Hidrográfica do Xúcar é inferior á recollida nos últimos 23 anos. A precipitación acumulada nese ano foi duns 281 mm mentres que o valor medio anual nos últimos 23 anos é duns 439 mm.

Esta situación de falta de precipitacións e esgotamento das reservas embalsadas fixo que se declarase a situación de seca no mencionado ámbito mediante o Real decreto 355/2015, do 8 de maio, polo que se declara a situación de seca no ámbito territorial da Confederación Hidrográfica do Xúcar e se adoptan medidas excepcionais para a xestión dos recursos hídricos, no marco das medidas adoptadas polo Goberno para paliar a situación de seca.

Este real decreto tiña unha vixencia temporal até o 31 de decembro de 2015, pero dado que a situación non mellorara nesa data, prorrogouse a declaración de seca mediante a disposición adicional terceira do Real decreto 817/2015, do 11 de setembro, polo que se establecen os criterios de seguimento e avaliación do estado das masas de auga superficiais e as normas de calidade ambiental, até o 30 de setembro de 2016.

Con posterioridade e mediante o Real decreto 335/2016, do 23 de setembro, polo que se prorroga a situación de seca declarada para o ámbito territorial da Confederación Hidrográfica do Xúcar, prorrogouse novamente a declaración de seca até o 30 de setembro de 2017 e máis tarde prorrogouse de novo até o 30 de setembro de 2018 mediante o Real decreto 850/2017, do 22 de setembro, polo que se prorroga a situación de seca prolongada declarada para o ámbito da Confederación Hidrográfica do Xúcar mediante o Real decreto 355/2015, do 8 de maio.

O inicio do presente ano hidrolóxico 2017-2018 foi inusualmente seco. Nos cinco primeiros meses, a precipitación media na Demarcación Hidrográfica do Xúcar foi da orde da metade dos valores habituais para ese período e as achegas de orixe natural presentan un dos peores rexistros dos últimos 77 anos.

Ben que durante os meses de marzo e abril de 2018, data de inicio de tramitación deste real decreto, tiveron lugar precipitacións significativas, o que se traduciu nunha leve melloría dalgúns indicadores, xa con data do 1 de maio de 2018 a situación poñía de manifesto que cinco sistemas de explotación estaban en alerta (Cenia-Maestrazgo, Turia, Xúcar, Marina Alta e Vinalopó-Alacantí), e o que resultaba máis preocupante, todos os sistemas de explotación do ámbito da demarcación tiñan os indicadores de seca prolongada, baseados no rexistro de precipitacións, con valores moi baixos, o que podía significar un avance do risco durante os próximos meses.

Esas previsións confirmáronse en 1 de setembro de 2018 no informe de seguimento de indicadores de seca no ámbito territorial da Confederación Hidrográfica do Xúcar, que sinala a seguinte situación: en alerta encóntranse os sistemas Cenia-Maestrazgo, Turia, Marina Alta e Vinalopó-Alacantí; en situación de prealerta encóntranse os sistemas de Palancia-Los Valles, Serpis e Marina Baja. Por tanto, do total de nove sistemas que integran o ámbito da Confederación Hidrográfica do Xúcar, sete presentan unha situación que xustifica a tramitación deste real decreto e a aprobación da prórroga da situación de seca declarada durante o ano hidrolóxico 2018-2019.

A situación exposta motivou a aprobación do Real decreto lei 10/2017, do 9 de xuño, e da Lei 1/2018, do 6 de marzo, polos que se adoptan medidas urxentes para paliar os efectos producidos pola seca en determinadas bacías hidrográficas e se modifica o texto refundido da Lei de augas, aprobado polo Real decreto legislativo 1/2001, do 20 de xullo, e cuxo ámbito de aplicación se proxecta, como non podía ser doutra maneira, na Demarcación Hidrográfica do Xúcar. De maneira que as medidas contidas neste último instrumento complementan as previstas no mencionado Real decreto 355/2015, do 8 de maio.

Por todo o anteriormente exposto faise necesario prorrogar novamente as medidas extraordinarias recollidas no Real decreto 355/2015, do 8 de maio, até a finalización do ano hidrolóxico 2018-2019, en previsión de que esta situación de seca se prolongue ao longo do tempo.

A prórroga da declaración de seca no ámbito territorial da Confederación Hidrográfica do Xúcar realízase neste real decreto de acordo co disposto no artigo 27 da Lei 10/2001, do 5 de xullo, do Plan hidrolóxico nacional, e en cumprimento do artigo 58 do texto refundido da Lei de augas, aprobado polo Real decreto legislativo 1/2001, do 20 de xullo, e tendo en consideración o estado dos sistemas de explotación da demarcación segundo o Sistema global de indicadores hidrolóxicos do Ministerio para a Transición Ecolóxica, que integra os indicadores de estado definidos nos plans especiais de actuación en situación de alerta e eventual seca nas bacías intercomunitarias, aprobados pola Orde MAM/698/2007, do 21 de marzo, en cumprimento do establecido na Lei 10/2001 antes mencionada, tendo en conta o último informe do 31 de agosto de 2018.

Na elaboración deste real decreto foi oída a Confederación Hidrográfica do Xúcar, así como todas as comunidades autónomas que poidan resultar afectadas.

Este real decreto adécuase aos principios de boa regulación a que se refire o artigo 129 da Lei 39/2015, do 1 de outubro, do procedemento administrativo común das administracións públicas. En concreto, cumpre cos principios de necesidade e eficacia, pois trátase do instrumento máis adecuado para garantir a subministración de auga para consumo e para rega dun modo homoxéneo en todo o territorio afectado, o que garante o interese xeral. Tamén se adecua ao principio de proporcionalidade, pois non existe outra alternativa menos restritiva de dereitos ou que impoña menos obrigacións aos destinatarios. En canto aos principios de seguridade xurídica, transparencia e eficiencia, a dita norma adécuase a estes pois é coherente co resto do ordenamento xurídico, procurouse a participación das partes interesadas e evitáronse cargas administrativas innecesarias ou accesorias.

Dado o carácter de urxencia que reviste esta disposición, derivado das consecuencias que a situación de seca provoca, na súa elaboración abreviouse o trámite de audiencia e información pública, segundo o disposto no artigo 26.6 da Lei 50/1997, do 27 de novembro, do Goberno.

Na súa virtude, por proposta da ministra para a Transición Ecolóxica, de acordo co Consello de Estado, e logo de deliberación do Consello de Ministros na súa reunión do día 28 de setembro de 2018,

DISPOÑO:

Artigo único. *Prórroga da declaración de seca aprobada polo Real decreto 355/2015, do 8 de maio, para o ámbito da Confederación Hidrográfica do Xúcar.*

1. Prorrógase até o 30 de setembro de 2019 a declaración de seca aprobada para o ámbito do Xúcar polo Real decreto 355/2015, do 8 de maio, polo que se declara a situación de seca no ámbito territorial da Confederación Hidrográfica do Xúcar e se adoptan medidas excepcionais para a xestión dos recursos hídricos. Esta situación prorrogouse inicialmente mediante a disposición adicional terceira do Real decreto 817/2015, do 11 de setembro, polo que se establecen os criterios de seguimento e avaliación do estado das augas superficiais e as normas de calidade ambiental, e novamente mediante o Real decreto 335/2016, do 23 de setembro, polo que se prorroga a situación de seca declarada para o

ámbito territorial da Confederación Hidrográfica do Xúcar polo Real decreto 355/2015, do 8 de maio, e para o ámbito territorial da Confederación Hidrográfica do Segura polo Real decreto 356/2015, do 8 de maio, e finalmente polo Real decreto 850/2017, do 22 de setembro, polo que se prorroga a situación de seca prolongada declarada para o ámbito da Confederación Hidrográfica do Xúcar polo Real decreto 355/2015, do 8 de maio, polo que se declara a situación de seca no ámbito territorial da Confederación Hidrográfica do Xúcar e se adoptan medidas excepcionais para a xestión dos recursos hídricos.

2. A prórroga establecida no número anterior finalizará no caso de que o organismo de bacía e a Dirección Xeral da Auga constaten que deixan de darse as circunstancias obxectivas que motivaron a declaración, conforme a evolución dos indicadores de Estado establecidos no Plan especial de actuación en situacións de alerta e eventual seca da Demarcación Hidrográfica do Xúcar que estea nese momento vixente. Para tal efecto, a Confederación Hidrográfica emitirá o correspondente certificado en que quede acreditado que non é necesario manter a declaración de seca prolongada.

Disposición adicional única. *Gasto público.*

1. A realización de obras e outras actuacións técnicas que fosen precisas como consecuencia da prórroga da declaración de seca que se establece no presente real decreto deberán ser financiadas de acordo coa normativa vixente e con cargo ao orzamento da Dirección Xeral da Auga.

2. As medidas incluídas nesta norma non poderán supor incremento de dotacións nin de retribucións, nin doutros gastos de persoal.

Disposición derradeira primeira. *Título competencial.*

Este real decreto dítase ao abeiro do artigo 149.1.22.^a da Constitución española, que atribúe ao Estado competencia exclusiva en materia de lexislación, ordenación e concesión de recursos e aproveitamentos hidráulicos cando as augas discorran por máis dunha comunidade autónoma.

Disposición derradeira segunda. *Concordancia de preceptos entre o Plan hidrolóxico do Xúcar vixente e o anterior.*

Para os efectos do establecido na disposición adicional segunda do Real decreto 355/2015, do 8 de maio, polo que se declara a situación de seca no ámbito da Confederación Hidrográfica do Xúcar, as referencias feitas aos artigos 8.1, 10.1, 12 e apéndice 6.1 do Plan hidrolóxico do Xúcar, aprobado polo Real decreto 595/2014, do 11 de xullo, entenderanse feitas respectivamente aos artigos 32.1, 10.1, 12 e apéndice 6.1 do vixente Plan hidrolóxico aprobado polo Real decreto 1/2016, do 8 de xaneiro.

Disposición derradeira terceira. *Entrada en vigor.*

O presente real decreto entrará en vigor o mesmo día da súa publicación no «Boletín Oficial del Estado».

Dado en Madrid o 28 de setembro de 2018.

FELIPE R.

A ministra para a Transición Ecolóxica,
TERESA RIBERA RODRÍGUEZ